

江
西
詩
徵

江西詩徵卷五十

南城曾煥賓會編

明

黎擴

擴字大量號雅齋臨川人正統初舉賢良授貴池訓導陞蘇州教授有學鳴稿

行路難

行路何難塵沙如霰塵以涅衣沙以垢面行路何難路行多阻水度無梁山行有虎我欲行路路苦難行雖有塵沙尙全吾生水雖無梁不渡由我我遭猛虎行將安可

擬古

乘此日少霽辭君將遠遊所遊雖云遠前途契深求鳥歸
認舊林狐死懷故邱微物尙有知吾心安所尤清時不屢
得欲往步難北回首仰日光復被浮雲隔鬢髮變秋霜衣
帶減疇昔此意難重陳重陳復何益

西溪草堂爲廬陵宋內翰賦

聞說西溪上春風小院開野蠶成繭盡江燕引雛回竹裏
圍蒼局荷香沁酒杯晚涼疎雨過隨意步蒼苔
聞說西溪上波光映遠天吟蛩催急杵落鴈近漁船紅樹
斜暉淡黃花曉露鮮田家新釀熟共醉月明邊

送人還盱江

新涼生白苧遊子倍悽然客思秋砧外鄉心旅鴈前西風

千里道斜月五更船亦有還家夢隨君到汝川

山茶

葉苦寒摧綠花愁雪妬紅自知榮適晚不敢恨春風

洞庭秋月

湖上清秋夜扁舟泛碧波紫簫吹不斷無奈月明何

漁樵耕牧圖

漁水心情淡淡鷗波身世悠悠清風楊柳幾曲夜月蘆花

一洲

窈窕徑穿林下丁丁斧徹雲閒耳慣猿驚鶴怨跡窮紅樹

青山

南村北村雨足十畝五畝秧齊帶月肩犁未出催人布穀

先啼

芳草茸茸煖碧烏
健濕濕春肥滿簑
烟雨朝出一笛斜
陽暮歸

喻省

省字伯唯南昌人
正統初官常州同知

送友人

梅花殘雪照晴川
立馬郵亭思惘然
媿我飄蓬仍薄宦
與君分手正殘年
一樽行色沙頭酒
千里鄉心月下船
垂老莫言歸計拙
綠編研北是良田

劉定之

定之字主靜號呆齋永新人
正統元年進士第一

入翰林成化初以太常少卿兼侍講學士直內閣
進侍郎卒諡文安有呆齋集

裕陵挽詞

睿皇厭代返仙宮武烈文謨有祖風享國卅年高帝並臨
朝八閩太宗同天傾玉蓋旋從北日昇金輪却復中賜第
初元臣老朽負恩未報泣遺弓

義山

家居禾川湄義山日對面悵未得登臨此心徒健羨今春
雪中來半途足已倦顧視萬坡陀茫然莫可辨巖蘿冒飛
隼林葉響急霰俛若赴井汲仰疑登塔旋奇觀豈神助寒
苦亦吾願日暮抵山麓小溪亂石濺僕夫指龍湫時或出

雷電信宿畱山閒陰晴已千變仁里固有鄰誅茅從所便
嗟我四方人安得長眷戀

五臺行

詠梁唐晉漢周

繁臺

紇干山頭雀凍死午溝蛇化爲龍起禪代不待九錫來二
晉醉投雙陸子出警入蹕東西京猶上繁臺日閱兵羣姬
應聚那復辨諸侯麇至誰能爭天道好還信豈偶夜環殿
柱仍三走祿山仰空若猪屠翟讓仆地如牛吼

愁臺

莊宗戰敗登愁臺酒酣四顧悲風來野人獻雉味徒美壯
士騎馬顏如灰可憐昔日英雄才夾河蹀血馳風雷勝兵

百萬使臂指伶官數十爲禍胎蕭蕭落葉墓門棘獨眼龍
眠墓中泣生兒但作鬪雞豪琵琶火消燭髀赤

沙臺

穹廬拜受白貂裘身披入洛垂藻旒甘呼高鼻奴作父豈
料大目兒爲讎兒無遠略浪戰爾紗帽迎降淚如洗總將
血屬入邊塵但颺骨灰隨漢鬼建州耕穫風霜寒猶想沙
臺射鹿還殿前金刀割兔肉門外雕戈來可汗

北臺

白睛黑面沙陀劉乘時虎視吞九州龍牀繼拱兩父子鳳
歷才閱三春秋湘陰登樓求死所大原建廟依皇祖髯王
陣敗憤世讎獨跨黃驢泣山雨歸來撫劒自悲歌無兒送

老如愁何薛甥繼了何甥繼却向北臺降宋帝

銅臺

銅臺建節亦已好猶愛金門乘羽葆盡捐骨肉換尊榮花
項皮枯雀兒老瓦棺紙衾瘞姑公黃旗紫蓋從柴宗共誇
英主開中夏倏見寡母遷西宮當時只有范丞相慣識征
誅與揖讓九鳥迭落須臾閒又看一輪紅日上

楊銘

銘信豐人正統三年鄉舉官山西道御史

秋日登臨秀亭

舊題壁上記曾遊風景今來大不侔村郭樓臺千戶曉山
川烟火八窗秋杜陵戀客重過魯王粲思鄉竟別劉倚遍

闌干顚北面江湖雖遠獨無憂

劉儼

儼字宣化吉水人正統七年進士廷對第一除修撰官至太常寺少卿卒贈禮部侍郎諡文介

宮詞

霜月照簾櫳開簾獨凝佇玉闌花斂房金井桐垂乳風傳
百和香羊車往何許嘿嘿整雲鬟鴉啼俄向曙

王儼

儼字民望自號甘貧叟泰和人正統七年進士官
兵戶二科給事中致仕成化間纂修英廟實錄聘
摠裁後爲澄江書院師家居三十年不入城府有

南齋集

同陸大參敬齋張真人心湛遊仙巖

積想名巖勝其如俗務妨觀風聊暇豫取道共翱翔隔夕
愁陰雨凌晨喜太陽烟霞巖洞主雲鶴紫微郎減從便私
服方舟駕野航溪迴秋水漲花逐午風狂因惜峯巒過翻
嫌接應忙須臾窮島嶼轉折歷微茫峭壁非人到幽龕有
佛藏丹爐寒火候藥室秘靈方仙犬劉安去神羊道士亡
輓轡丹綫轉機杼錦多長立處樵柯爛行來屐齒涼山巖
皆戍削水窟亦汪洋舟楫通雲路鼉駕石梁枝撐盤鳥
道曲屈遶羊腸倒影崖全浸浮空蓋自張佛宮天作瓦僧
舍石爲廊巧鑿張公洞虛憑節道房雲飛千澗雪瀑濺四

時霜神禹圖方涉齊諧志未忘真人騎白鶴老子駕青羊
葛令丹砂井君平卜肆坊將尋赤松去歸老白雲鄉

饒秉鑑

秉鑑字憲章廣昌人正統九年鄉舉歷肇慶同知
廉州知府屢平寇盜上疏論監軍及諸將爲權貴
所中褫職歸立義倉義學建雯峯書院與羅應魁
講學

麻姑山

遠上麻姑第一峯仙家高在白雲中洞天不雨藥空長野
徑無人花自紅孤鶴夢回瓊館靜綵鸞聲斷玉樓空擗麟
仙侶知何在滄海桑田思不窮

陳綱

綱湖口人正統九年鄉舉

石鐘山

石室登臨處聽鐘入夜分山河俱大地軒冕總浮雲帆影
天涯現風聲樹杪聞此中應戀我何以答明君

彭時

時字純道安福人正統十三年進士廷試第一授
修撰其明年卽同商輅入閣預機務憲宗朝議兩
宮尊號力爭得請成化初累官文淵閣大學士以
言不見用屢乞放還不允進少保卒贈太師謚文

憲

石鐘山

石鐘之山高屏巔上下嵒踞江湖開秀連匡廬五老聳雲
漢勢壓小孤一柱雄江關山根怪石亦希有大者如房小
如斗洪濤巨浪日夕相吐吞聲撼鯨魚半天吼噲啞蹻蹻
時有聲石鐘無名迺得名寺僧冶金震昏曉何如此鐘特
出天工成江濱屹立幾千古無人扣鐘與鐘語眉山昔有
蘇文忠湖口今惟王武庫王君家住石鐘旁讀書終日聲
琅琅登高攬秀縱情賞飄然逸氣凌風翔年來通籍居京
國猶託丹青寫奇跡披圖一一指示人令我塵心頓消釋
我家正在大江西經過惜未窮攀躋何日南還一寓目重
磨崖石當畱題

吳 滙

滙字會川新喻人正統十三年進士第一精于經義歷官國子司業乞疾歸

萬松軒

陶公五柳成陳迹王氏三槐今寂寂爭似陳家種萬松累葉相傳見遺澤只今種來幾百年枝柯鬱鬱凌雲烟貞心肯使螻蟻蠹老幹疑有蛟龍纏東林西林正相對南窗北牕交翠黛一簾雨色已足看十里風聲更堪愛軒中幽人冰雪襟與松勁直同一心興來匡坐清陰下仰招元鶴彈瑤琴琴罷撫松情愈暢更喜香醪熟新釀醉臥不知天地寬門外閒雲任來往

九鷺圖

林塘過雨天氣涼藕花半吐蘆葉長參差九鷺忽相集毛
羽潔白如朝霜一鷺飛秋空漠漠秋雲橫一鷺鳴九皋
如孤鶴聲二鷺啄食五鷺宿宿食由來從所欲澄江水落
魚正肥烟渚風清夢初熟若人自昔工寫真新圖一幅如
有神吮毫題罷發長嘯結廬欲住寒塘濱

雲山圖

青山何盤盤頂上多白雲白雲來往本無定青山不動高
嶙峋山巔白雲山下水山人在山呼不起桃花塢接釣魚
灣松竹林籠賭棋墅飛湍瀑布天際來硤嵒轉石如轟雷
得非仙都與秦望不然武姥連天臺雲山主人志幽雅面

山看雲冬復夏相期驅雲天上行慎毋空老山巖下

送指揮習固定回鄉

秋風颯颯秋雨涼秋草爛死秋花黃伊人久矣住京國感
時別我歸故鄉故鄉迢迢何處是南望渝川八千里一盃
餞別須盡懽明日相思隔烟水

懷廖孟端主事

四十餘年到處家只將詩酒作生涯爲郎粉署名猶著解
戎遼陽鬢已華夜雨孤墳添宿草秋風三徑落殘花我來
爲賦招魂些忍聽空林泣曙鴉

耕隱

懶向金門謁縉紳邱園耒耜日相親鹿門高節龐居士谷

口清風鄒子眞春雨一犁秧簇簇秋波萬頃麥粼粼等閒
名利無拘束應是當年擊壤人

李奎

奎字文耀弋陽人正統閒督京畿學政舉儒士五
十餘人主師席士習丕變歷大理少卿致仕歸著
有詩經辨疑

野坪書屋

山下桑麻萬井平山房深處白雲橫澗泉近繞五七里牧
笛時聞三兩聲春服漸厭花未老稻田剛熟酒初成羈栖
自是朝陽願謾說當年野雉坪

王吾英

吾英安福人正統閒布衣

絕句

洗耳無心枕石磯
許身雲月共相依
閒中莫唱紫芝曲
怕有人來敲竹扉

梁矩

矩字式之臨川人
正統中爲本郡訓導
有寧靜軒集

重建擬峴臺

誰建高臺名擬峴
當年賢守有裴公
四郊烟水眞如畫
千里弦歌尙可風
往事登山懷叔子
雄文刻石重南豐
酒酣吟笑欄干外
天際斜陽鳥背紅

羅宜

宜字從可南城人景泰初以經明行修薦官南豐訓導

雲門寺

長歌康樂詩遠訪麻源谷逶迤山竇深綠繞邨路曲憩坐
雲門幽靜掃苔堦綠飛橋貫晴虹奔流漱寒玉銅陵故無
恙華子今不復瞻彼釣魚臺緬想藏書屋勝跡半已非游
觀駭心目居人巢雲松瀟洒異塵俗開尊暢雅懷題詩繼
芳躅一笑澹忘歸斜陽下山麓

楊崇

崇字尚賢豐城人受學於胡九韶景泰元年鄉舉

官桂林府同知以却蠻寇功擢知柳州府尋除永
州築祁陽城均徭役行九等之法

望江亭

日暮孤亭碧影閒依人流水自潺湲烟汀雲樹蒼茫外沙
鳥風帆出沒閒趁市客來朝問渡打漁人去暝尋灣幾年
穩合紅塵夢江上清波一解顏

山中

萬壑千峯一翠連崑羅眞境獨翛然寒巖花鳥纔春事半
日追隨亦小年

高明

明字上達號五宜貴溪人景泰二年進士初事母

以孝聞授御史過事敢言晉僉都御史討平揚州
鹽寇并條上鹽政利弊巡撫福建平上杭盜移疾
歸先期告家人端坐而逝有南臺籌亭等集

繼陶軒

丈夫貴適志出入禮義中正途苟失趨役役何所從卓哉
彭澤宰不可拘樊籠情發歸去辭碧落鸞冥鴻物物有可
憶豈特菊與松千載舊宅邊五柳猶清風素琴隨漉酒歡
歌興無窮吾鄉有先達邈矣高志同

早閑亭

成化辛卯疏乞終養歸於貴溪城東去三舍許建
別墅創小亭扁曰早閑及戊戌奉詔討賊

八言集 卷三
八年高臥早閑亭病逐年加鬢漸星四壁蕭然安一榻寸
心虛了湛三靈風來月下花搖影雨過庭前草送青夢裏
忽聞天子詔踉蹌十步啟柴扃

安仁舟中卽事

早魃爲殃近半年信河灘涸不通船夜來無雨漲三尺知
是天然是偶然

臨終引柩詞

執紼行人慢慢歌細聽無奈動情何儻來富貴眼前事浪
得聲名耳畔過今古已更新世界乾坤還是舊山河英雄
後輩催前輩如水滔滔再返麼

章軒

軒字士昂鄱陽人家金陵景泰二年進士授南京
吏科給事中天順初上疏言事改戶科成化中歷
右副都御史提督松潘軍務條八害三利以聞累
擢禮部尚書致仕有清風亭稿枕肱集及海岳消
埃喻蜀稿邊錄等書

竹枝詞

勸郎切莫上巫峯
勸郎切莫往臨邛
臨邛少婦解畱客
巫山峯高雲雨濃

山桃花開紅更紅
朝朝愁雨又愁風
花開花謝難相見
春色無邊愁殺儂

西湖荷葉翠盈盈
露重風多蕩漾輕
荷葉團圓比儂意
露

珠不定似郎情

勸郎水底莫鋪綿
勸郎石上莫栽蓮
水底鋪綿綿易爛
石上栽蓮根不堅

春夜詞

金鴨香消午夜天
粉牆西畔控秋千
荼蘼夢怯春寒峭
起傍雕闌看月圓

采蓮曲

采蓮朝下湖西曲
短袂輕綃鬪粧束
小紅艇子駕雙橈
盪破粼粼鏡光綠
荷葉荷花颺錦雲
鴛鴦兩兩護波紋
荷錢却喜似儂鈿
藕絲還愛似儂裙
湖頭昨夜西風起
沙嘴新添三尺水
翠倒紅翻相向愁
波心半露青蓮子
采蓮復采

迴回船正迎浪不惡歸去遲只嫌明月上明月團團湖水
秋清光滿面照儂羞郎家只隔湖南埗咫尺橫波日夜流
麗情曲

海棠雨歇春夜長轆轤驚夢飛鴛鴦玉肌苦怯東風急帳
冷流蘇熏繡裳起來窺鏡倦梳洗元雲滿屏飛不起玉麟
金爵翠翹新似與春光鬪明媚花牀曉霧香濛濛春困泥
人星眼朦朧鈎鴨武隔牕語怪殺東君深淺紅試呼小翠
卷朱箔一雙黃蝶花閒落

春曉曲

妖紅軟綠含朝陽鶯吟燕語愁人腸苔痕漬露翡翠濕杏
花撲雪臙脂香鳳衫輕薄春寒冽斜倚銀屏怨離別葉砧

一去歸未歸屈指東風又三月

去婦詞

刺促何刺促出門不敢分明哭憶初癡小嫁君時自謂生死常相隨誰知中道生乖阻棄妾紅顏不如土弓鞋窄小荆棘多掩淚重尋舊行處浮雲上天歸有時君心一失那能回糟糠不忘如再好重整荆釵與偕老

燕歌行贈徐七遵誨

黑雲黯黯陰山北跨馬長征殺強賊腰閒寶劍縣吳鉤寒光閃爍青蓮色一從仗劍出蕭關幾載風塵浪洞閒鐵甲戰酣青海月羽書飛捷白狼山論功自合分茹土猶向軍前朝沐雨可憐白首困窮荒虎帳何人日歌舞滿地妖氛

血色脾輪萬里居人稀羌兒吹笛朝出塞壯士橫戈夜
突圍從戎却念辭家久數奇尙落他人後一聲寒角秋風
鳴望鄉幾度頻搔首男兒離別何足嘆才器如君世稀有
聞外會有推轂時肘後黃金印如斗玉門賊騎去紛紛更
上燕然勒大勳君不見匈奴多繫頸至今猶說衛將軍

柳枝詞

千絲萬縷盡樓前搖曳東風舞翠烟試問長年能送客何
如繫住別離船

步虛詞

霧閣深深客到稀閒花繡滿碧苔衣幾回奏罷瑤臺謫
得金虬月下歸

斷腸曲

江頭浪白烟如織行舟一去無消息去年有書在洛中今年書到上臨邛蘭缸昨夜生金粟今日長安問龜卜出門不識東與西遊絲落絮隨風迷

出塞曲

吹角出轅門軍中寂不喧塞鴻驚陣起邊騎隔河屯箭鏑秋雲黑旗搖落日昏腰間雙劍在猶未報君恩

劉生

少年學武兼學文姓名不屬羽林軍殺人睚眦不敢視橫行抱劍遊三秦關鷄擊筑時將暮馬蹄慣踏章臺路一朝官裏賜鉤符百戰捐身寧復顧平生挽弓能挽強區區郭

解何足當願爲豫讓報恩死不學李陵嬰耻亡

車遙遙

征夫將早適起拂車上霜澹月殘星白遙思路正長驅車
出門遠少婦腸空斷不見車上人但聆鐸聲轉鐸聲去悠
悠聞道戍涼州不識涼州路空懷萬里愁愁來不能禦魂
逐車輪去願作石尤風吹折車前樹

江南曲

桃花斑斑落紅雨玉釭春酒濃如此吳姬白紵裁舞衣一
曲嬌歌少年子曲名江頭日晚停商舶楸中金多爲上客常
壚一斗沽十千引滿紅螺吸明月栖空月落江水寒勸君
且宿茱萸灣遲明大艚掛帆去千里烟波傷玉顏

結襪子

大梁公子信陵君貴介豈比諸侯卿平生折節能下士夷
門屠市俱成名信陵一去今千載開閣平津竟虛待士風
愈下俗愈偷望履呈身何足怪簞絡紛紛難具陳私恩桃
李滿門春周公吐哺不可見吁嗟結襪今何人

風木悲鳥二操爲李景暘侍御作

惟木兮在阿淒風分孔多風無寧日兮木無寧柯念兒有
身兮乃父之枝兒思終養兮父不待兒顧斯木兮兒心則
悲

惟鳥兮在屋月黑兮風淒以促啞啞哺母兮報母之育顧
兒有身兮實母之雛兒思返哺兮兒母已殂豈兒有心曾

不如鳥

長安道

長安在何許定鼎燕薊北周道千里平商邑四方極金臺
玉壘何雄哉重關設險從天來黃道祥光直南見紫微中
宮正北開天連閣道星辰拱日射觚稜金碧聳百尺文樓
五鳳飛九重魏闕雙龍擁長樂鐘聲曙色寒千官劍履集
朝端龍函捧敕頒三殿象輦駢琛響八鑾皇家制度超前
古文物聲名播寰宇白雉遙聞貢越裳龍媒又見來西土
太平治道軼唐虞彬彬多士皆文儒揚雄已奏甘泉賦司
馬還陳封禪書葱蘢王氣浮丹宸承露金莖蘊雲起紫禁
彤墀月似銀玉河金水花如綺九陌香塵拂面飛鳴珂初

散午門西王侯第宅施行馬公子園亭爭鬪鷄王侯公子
多如雨大道青樓比張許玉笙吹月鳳雙飛繡幙圍春鷄
並語雕鞍寶蓋日過從片言出口生華風始見金張初賜
第俄聞衛霍又旌功六街三市相連絡佛舍飛甍絢丹腹
百貨都歸大內東人才盡入平津閣御史臺前烏欲啼將
軍營裏馬頻嘶教坊夜月人如玉上苑春風錦作畦風光
節物年年在萬世河山長不改罷官廷尉自書門遷仕中
丞彌映彩莫言李廣不封侯誰惜馮唐易白頭青史功名
今已矣江湖高起見京樓

感遇

披裘詣中野拾薪以行吟孰云季子賢顧謂取遺金天地

物有主妄攫誠何心焉知怯僂者掉臂方駸駸

荆山產奇璞不惜屢獻之苟懷別足憂至寶橫路歧何如
南陽臥謳吟梁父辭終然致三顧可使大名垂

老狐戴闕屢夜拜北斗神綏綏曳長尾頃刻化爲人怪異
固莫測妖術方日新高城竅深窟蟠結無與倫望之不能
灌憂憤填秋旻

旄頭射長空邊馬南下牧封疆失固守老稚遭殺戮隴上
掠牛羊肥腴飽其腹豈無當世雄可比衛與霍長驅十萬
師橫行淨沙漠

題大佛洞

平生好幽勝所至窮躋攀今朝銜使命偶此登名山縈迴

小洞底豁然異塵寰蒙茸竹雲細蕭颯花雨寒下有千尺
流晝夜聲潺湲巍巍大金仙坐鎮石壁閒歲月知幾何苔
蘚生爛斑古今一幻泡等是何足歎我來愜清賞又得半
日閑振衣起林麓笑逐孤雲還

田家雜興

步履出東郭南風溪午時偶來松樹下竚立澹忘機野老
見我至情親語依依桑柔蠶已浴麥深雉初飛俯仰玩物
理逍遙詠而歸寄謝王良子虛名徒爾爲

萌簷冬日晴懷抱良不惡柴門晝始開鷄犬散籬落今朝
無客至婦子相聚樂牀頭熟新酒聊復共斟酌高歌亦自
慰焉知死溝壑

舟經湘潭有懷屈賈二子

牽舟西南上所往非一程
今日到湘東日出潭水明
推篷見青山依依如送行
時當長養節好鳥聲和鳴
仰視天宇闊俯臨川上平
薰風颯然至洗我浮世情
古人不可見所見惟虛名
毋爲計寵辱頓使此心驚

觀內相素軒錢公射鳥因賦鄙韻用呈

勝日良讌會逍遙
雲水鄉佳賓列四座繁
吹促飛觴時維
秋序晚穠穰垂田疆
覩茲農事成歡樂殊未
央高柳蔭虛亭殘荷薦
餘香有鳥類山雀枝上
止且鳴叶左右紛射之
鳥號竟虛張公起挾一
矢疾發如流星叶翩然中
修尾遠墮池水傍嶽賓
競稱賞此巧奪穿楊方
今西北境獫狁來

勵勦安得我公輩強弓用其長一箭退勍敵摧北如驅狼
坐令四海閒至治成虞唐

贈清貧長老

黃金沙界名淨土中有僧爲持教祖說法能超最上乘常
感天花向空舞禪關盡日白雲封爲愛疎閒似遠公秋雨
涼蟬三徑葉夕陽歸鳥一聲鐘支頤夜坐林閒石白月清
潭了無迹問師戒臘今幾何笑指青松數千尺有時聚石
來講經石頭盡點如有聞有時浮杯去渡海踏碎萬頃波
璃雲歸來清梵維摩室何用區區九年壁降龍解虎人不
知惟有閑師老人識

趙松雪寫東坡小像并書其山城杏花詩內用錢公

出視命題因次原韻如左

漚波漲碧蘭苕春王孫英標真可人
眉山老仙招不起東風誰薦溪頭蘋
清興懷賢應淬發一夜松窻歌白雪
曉來點筆爲傳神宛似臨臯步明月
杏花零落山城中悠悠往事如雲空
何當共飲玉堂酒半枝燭影搖殘紅

點蒼山

點蒼山色何奇哉芙蓉朶朶天邊開
嶙峋直上九千仞下視羣岫皆蓓蕾
夸娥不能移巨靈不能劈南風十日吹
不平但見雲間橫鐵壁琪花瑤草四時
開幽致彷彿非人間千年老雪消不盡
龍湫六月生陰寒我欲乘風升絕頂倒
控蒼虬凌倒景黃鶴仙人招不來目斷
蓬萊五雲境

春雨臥病書懷

用世才偏拙，治生計益窮。
接離巾側著，櫛火初紅。
病喜聽琴愈，書因看劍工。
茫茫天壤內，何必楚人弓。

閑居漫興

一榻清於洗，脩然思不羣。
紫苔行處滿，黃鳥坐來聞。
琴奏梅間月，碁敲石上雲。
浦塘新水暖，花落覆輕紋。
鎮日掩柴扃，長歌醉復醒。
草生元亮井，竹覆子雲亭。
煖玉礪棋局，秋金鑄硯屏。
都將舊遊事，一笑晚山青。

晚至華陰擬唐人作

馬首日將晡，行行歲欲徂。
古祠寒蘚合，仙掌斷霞孤。
山暝聞啼鳥，溪晴見浴鳬。
洛城知不遠，宮樹晚模糊。

積雨青陽道中

浙漚連朝雨驅馳道路中泥深愁沒馬草滿畏飛螻

有大蟲如大

蟬土人號爲螻
簪螯人輒瘞

重霧山含毒驚湍石激風已將身許國何

敢怨途窮

白沙民舍

初日照林扉山深客到稀柳溪鶯獨囀麥隴雉雙飛少婦
提筐出中男荷畚歸盛時征賦少生事莫嫌微

暮過山寺

寂寂南朝寺荒涼露遠郊夕陽僧掃葉秋雨鷺辭巢斷碣
猶橫草遺龕半覆茅道傍泉湧碧疑是虎曾跑

贈明上人

悟得西來意禪關養性靈
藤陰侵座滿竹色覆池青
洗鉢魚吞飯傳燈鹿聽經
自無名利夢不著息心銘

憶金陵

爲憶江東地風光信可憐
侯門深似海官道直如弦
妓女釵簪驚兒僮紙放鳶
何時賦歸去醉向酒樓眠

滇南卽事

萬山藏古寨六詔雜諸蠻
爨女頭籠帽蕃僧耳墜環
啖蛇傳土俗屠犬祀神姦
更有西戎種輕生賦性頑

襄陽懷古

正馬南歸望故城半林殘
雨夕陽明雲邊岫接秦山
色樹裏河流漢水聲墮淚
有碑苔色古攔街無曲酒
旗橫那堪

回首成陳跡笳鼓西風愴客情

送徐遵誨公子之邊

羨君家世舊簪纓百戰常懷報主心
草檄有才追記室登壇無路繼淮陰
射鵬紫塞秋雲黑走馬黃河夜雪深
白首丹衷知未變歸來雙肘印懸金

題瑩僧官禪室

地隔紅塵接上方亂藤高竹曠蒼蒼
半屏夜坐雲牙冷一飯朝餐石髮香
雨後降龍歸咒鉢月明棲鶴下迴廊
我來欲問西來意安得醍醐灌頂涼

客中清明感懷

小衾孤枕興蕭然況是清明到客邊
千里有家悲遠信一

春多病但高眠梨花澹月秋千影楊柳東風蠟炬烟總是少年行樂處只今惆悵酒尊前

簡溪爲吏部吳主事題

溪上幽居敞竹扉溪邊春水淨苔衣吟抄甫里新詩草坐買嚴陵舊釣磯雲去青山當戶立雨來白鳥傍人飛也知習靜真成簡游俠無勞問是非

癸巳歲予齒四十九矣宦績無成道德日負悵然有感而作

久客懷歸尙未歸半生塵土浣征衣買臣每嘆行年困伯玉空知往事非春雨又蘇邊地草秋風應老故山薇太平時世身難補會向滄江問釣磯

九月 并序

予以幽憂之疾閉門不出者動閱數旬眉宇向秋
斐然愁絕故人尙寶司宋公忽有冶城登高之約
辭不能赴因誦杜子重陽獨酌盃中酒抱病起登
江上臺之句不勝幽興滿懷於是想像冶城風物
爲賦短章詩成會鄉友傅德修携諸公登高詩卷
來遂用書之于左

蕭蕭木葉下高枝又是深秋九日期黃菊酒香人病後白
蘋風冷鴈來時參軍帽落誰同調宋玉詩成益自悲有約
不能逢一笑看山窻下獨搗頤

酬姚世昌千戶見贈之作

多君志慕玉門關，誓策奇勳萬里還。
馬援自知才可試，馮唐誰謂老猶閒。
好風細拂青油幕，明月光搖寶劒環。
應笑麒麟千載後，幾人名姓畫圖間。

和秋林驛壁間大行人張器之詩韻

使車遙度古梁州，行色俄驚及早秋。
淺水黃茆山外路，斜陽紅樹驛邊樓。
牛羊出沒居民少，豺虎縱橫過客愁。
前路安岳達寧俱有盜賊嘯聚回首故鄉何處是，清霜一夜上人頭。

贈青羊觀道士

青羊道士無姓名，繞簷種竹門常扃。
蒼龍來問大還訣，白鶴下聽藥珠經。
六銖衣上繡星斗，三尺劍底驅雷霆。
相逢似識五雲吏，一笑向余雙眼青。

重至臨安分司

公署睽違又一期重來仍值禁烟時
闌干漬雨花枝重亭館留寒燕乳
遲無事且謀犀首飲有懷都寓少陵
詩東風可是無情甚白雪盈頭不肯吹

建業清明書事

節物催人到客邊江南風景迥堪憐
魚兒池館新生水燕子人家又禁烟
幾片落花寒食後數株高柳夕陽前
春衫小試香羅雪駿馬驕嘶白玉鞭
綠水青山渾似畫暖雲芳草最宜眠
松醪有客邀村社麥飯誰家洒墓田
自愧道傍楊子宅十年閉戶蝨生氈

小孤山

秀色真可餐雲鬟不須理江水濕羅衣芙蓉滿身紫

竹塋口

君住竹塋口妾家桃花津來往不相識青山應笑人

去壽昌作

來時此行李去時此行李俸外無一金不愧桐江水

駿馬

駿馬響金羈蹀躞長安道少年挽雕弓彈落花間鳥
駿馬出長堤繁纓繆革垂相逢休問姓知是羽林兒

雲山圖爲都閫王大經題

雲樹蒼茫落日遲山城秋色映旌旗大平邊徼多閒暇正
是將軍運籌時

次韻鄒允達懷仙吟

霧閣雲窗蘸碧虛黃梁枕上夢遶遶鶴翻松露無人到近
得麻姑一紙書

六銖衣上繡雲輕月下時時奏五英回笑人閒兒女夢紅
塵一枕不分明

和尚寶宋士皐先生春日符臺卽景之作因以奉酬
御路風清絕點埃茸茸新綠剪莓苔羽林環衛無人到惟
有中官日往來

寶帶橋

寶帶橋頭水滿磯小舟雙槳暮漁歸藕花蒲葉俱零落惟
見斜陽乳鴨飛

送蔣道士還茅山

黃冠野服列仙曹，天上朝元翠羽旂。
鐵笛一聲秋月白，叉騎黃鶴下三茅。

東林小隱

小隱東林地，身閒歲月忘。
曲池山倒影，虛閣水生涼。
雨潤琴絲慢，風薰藥臼香。
羨君清趣好，無夢到巖廊。

和劉工部欽謨無題韻

垂楊門巷嫩寒餘，銀鴨香清繞燕居。
粧鏡窺紅春有態，黛蛾分綠畫難如。
雲行巫峽頻牽夢，潮隔潯陽久曠書。
惆悵碧闌干外月，梨花疎影到窗虛。

金殿螢流月半沉，君王當日寵恩深。
風清香簾悄，秋扇露

冷空閑惹暮砧別院頻翻鵝管玉長門深鎖獸環金可憐
碧海青天外誰識姮娥夜夜心

細合鸞釵昨尙存幾看新水化生盆金魚戶鑰花千點玉
虎絲牽月一痕斑竹暝烟思帝子綠蕪春雨怨王孫愁來
更上危樓望江水悠悠也斷魂

簾外東風扇曉寒碧桃香老共誰看金鈴犬臥紅綿毯翠
羽鸚啼白玉闌花暗小機閑舊錦草深回磴絕鳴鑾却憐
夜月咸陽道露泣金人十二盤

秋夜夢康侍御用和

宦遊歲月易蹉跎青鏡流光兩鬢皤客夢不知江水遠鄉
心偏傍雨聲多張衡有咏唯愁在燭武無能奈老何爲問

舊遊驄馬客別來誰與共鳴珂

清明書感

兩年作縣越江湄回首鄉關未得歸
華髮又驚佳節換青雲堪歎故交稀
山村細雨梨花發茅屋東風燕子飛
潦倒不須嗟薄宦且將樽酒送斜暉

登岳陽樓

雲牕月牖俯清流滿目山川快壯遊
誰向江湖懷北闕謾誇樓閣冠南州
朱絃夜鼓湘靈瑟錦纜春迴楚客舟
欲起靈均歌九辯豐蘭沅芷徧芳洲

吳宣

宣字師尼崇仁人景泰四年鄉貢
歸隱巴山書院

肆力經籍已授左軍督府經歷劾長僚不法繫獄
十年始得自改中府陞鎮遠知府道疾卒有野庵
文集

宿黃檗寺

重疊青山放眼看飛泉如練落驚湍秋聲一夜不得住搖
蕩九天孤月寒

澹庵清隱爲紀員外父作

遠意托飛鳥妙韻諧素絲堯舜不必求許由無遠思蟲蟄
與魚遊千歲以爲期

瀑布巖

月高長握笛風急驟添絃欲問來何處青天但默然

枕上聞樵唱

半掩柴扉睡正饒
兒童忽地喚行樵
山人不是全然嬾
門外天寒雪未消

懷舊

斜月巴山起白煙
寂寥孤夢託秋絃
相看不盡雲中鳥
風雨梧桐憶去年

順承門外

水落雲寒野墓孤
夕陽紅樹遠模糊
香簾翠幕知何許
三月天南聽鷓鴣

銅陵崇福寺

白浪黃流遶滿風
薄陰天際轉孤蓬
浮生未了青山色
明月

日孤雲又向東

王臣

臣字克賓吉水人景泰四年鄉舉官南京監察御史奉命巡解池鹽曲盡良法奸盜無所逞商賈便

焉事聞璽書褒嘉卒於官祀解州忠愛祠

按廬陵志有王

臣係概子成化進士官侍讀

遊慧力寺

非圖非夢似曾遊步入招提境最幽塵世忽忘千古慮石林常占四時秋天空樹色遙屯野夜迴江聲半入樓今日已公茅屋下茶瓜還許杜陵畱

姚明

明字仲遠

一作達

貴溪人景泰四年鄉舉巡按兩浙

平反冤獄數十人擢陝西僉事督寧肅軍餉酌銀

米之價而上下之士卒踴躍卒於官

按貴溪有兩姚明一爲景

泰元年鄉舉

五宜菴

試問先生別墅高巖東際西頭屋上幾峯盤結門前一水
環流綠墊乾坤納納黃花風月悠悠何日歸陪杖履水邊
林下清秋

桃花灘

雨雜灘聲花亂零急流紅影不知層春風短棹行人過錯
認菰溪是武陵

彭華

華字彥實安福人景泰五年進士第一選庶常歷
官吏部尚書加宮保致仕卒贈太子少傅諡文思
有集

送劉通判進香畢遠任

鼎湖龍去已移時千里名香手自持松栢路瞻雲五色蓬
萊宮見日重熙感深極欲酬明聖歸遠何能惜別離獨有
竹林風月夜不堪回首重相思

明妃曲

抱得琵琶不忍彈風沙獵獵雪漫漫曉來馬上寒如許信
是將軍出塞難

登武功

聯步攀躋弟與昆，亂峯深處霧昏昏。
落花閒逐溪流出，芳草新遮野燒痕。
樹密微窺紅日影，山高直盡白雲根。
遙知絕頂丹書在，欲倩仙師細與論。

三月朔登絕頂

攝衣飛步上山顛，回首人閒一惘然。
千里渺茫雲似水，諸峯羅列樹連天。
風鳴石洞飛寒雨，火伏丹爐裊篆煙。
何日歸休無一事，閑身不惜訪羣仙。

開淵明讀書臺

春山鬱鬱樹蒼蒼，茅屋幽深石徑荒。
疑是淵明今尚在，白雲閒繞讀書岡。

送林太守元美致仕

太守平明獨上書東風解組賦歸與海邊舊種三珠樹門
外新懸五馬車竹簟簾牀支枕後芒屨布韞杖藜初北辰
回首高無極閒看浮雲自卷舒

尹直

直字正言泰和人景泰五年進士改庶吉士授編
修成化中與修英宗實錄摠裁欲去景泰帝號直
力爭累官兵部尙書加太子太保致仕卒謚文和
著有澄江文集及瑣碎錄等書

遊山

層崖深鎖薜蘿煙雲液泠泠一脉泉深竅直疑通渤澥靈

江西詩徵

卷五十

雙十二

无

秋長是伏蛻蛻天光倒浸苔衣冷月影清涵石竇爾豈獨
汲甘歸茗鼎仍分餘澤溉湫田

東綿洞

路入鷺峯驚石險望窮虎圳覺天隅東西還列千餘嶂南
北平分兩半都樹隱朝煙迷白屋田搖寒水浴青鳬怪來
石澗桃花膩不信仙源景致殊

挹清樓

高樓宏廠挹深清乘興閒登稱雨晴秋染晴江天際碧霜
酣紅樹口邊明飛鴻陣拂荒煙過歸客帆投野渡橫三顧
三華清不改老懷猶戀歲寒盟

武山

曉出城西更向西雨晴少軟快輪蹄心貪野趣清如洗目
極山光翠欲迷夾道黃花含露淡經霜紅橘壓枝低謾題
詩句畱山洞可以飛鴻印雪泥

花石潭

去縣東踰舍廵司扼兩河鹽沙堆白渚花石蘸清波風動
金鱗躍星馳綵鷁過幾回經宿處擊節和漁歌

黃土潭

夙發金魚壩行次石牛潭上水舟難挽還家路舊諳

李裕

裕字資德豐城人景泰五年進士授御史巡按陝
西上安邊八事石彪濫報首功奉詔覈實以聞有

強直聲擢山東按察使平大峴山賊寨累至吏部
尚書乞休有餘力稿

過大峴山夜宿古寺

名山奠青齊東海勢橫亘天際聳高峯雲閒繞飛磴窮崖
絕險峻急溜疾奔迸風雨變陰晴煙嵐自朝暝深樹綠陰
森閒花紅掩映憩息愜茂松登躋苦危逕禪宮倚崇岡虛
亭敞幽靜落日停征驂闌干時一凭野色望中遙鐘聲生
來定日暮哀猿羈愁亂孤興

早發膠州往沂與葉方伯馬上所聞見各成古詩

輕颺屏氛翳天際無纖瑕曙河頽坤維殘月明窗紗滿野
亂號雞隔林起棲鳥寂寥對短炬悽惻聞悲笳征驂命夙

駕玉勒黃金駟翩翩渡膠河悠悠徂瑯琊峯徠山萬里透
迤路三义驚湍激湍深谷虛谿衍陁峴抗亭館隈隩藏
人家細流抱村曲險逕沿崖斜緣危試捫葛涉深還問慙
徒旅憚路遙疲馬倦鞭撻行行雖云苦往往得景嘉山迤
遠峯疊溪斷芳叢遮笙簧林閒鳥鼓吹池中蛙空洞嘯虎
豹陟澗潛龍蛇岫列若圍屏樹密如排衙仙宮繞層阿閒
敞靜喧嘩烟嵐互明滅竹木相交加武陵遠相似山陰奚
足誇平生悵幽曠愛此停征車休憩倚茂松披拂褰餘葩
道人意勤倦畱我飯胡麻山盤薦細韭澗水烹新茶青童
抱綠綺朱顏雙髻了白雪翻素手清響殊琵琶是時微雨
收夕照籠餘霞縹緲川原廻徘徊瞻望賒不其閑火牛灘

水空囊沙斯人已淪謝往事堪傷嗟昨日齊城中百卉方
萌芽薰風忽南至綠柳連青葭匪徒時物變不覺鬢已華
行邁猶靡靡飄泊天一涯安知東陵侯學種青門瓜

送羅汝聞南還

靈曜迭來往氣序恒代遷自登青雲衢奄忽三十年君從
故鄉來念我家世聯披軒叙睽闊秉燭坐夜闌笑談未及
已驅車忽言還惜茲相會難中心增鬱煩清露萎秋草涼
颼激郊原魯酒倒玉壺餞送深水邊君還劍江去而我之
秦川臨期重躑躅涕淚如流泉南北分兩袂飛旆何翩翩
引領遙相睇泰岳生雲烟情敦諒難忘幽期結無緣願言
慎陳履俯仰不媿天

舒城登觀音寺偶會故人朱從善酌酒贗詩至晚而別

役役苦連旬，偶得山水趣。
龍岡勢盤環，淝水莽回互。
窈窕青蓮宮，獨倚雲閒住。
石門青重重，松杉夾微路。
殿隱翠微中，僧歸夕陽處。
飛溜澗香雪，寶樹凝甘露。
梵語空中聞，天花簷外雨。
山開景覺媚，溪斷人稀渡。
超然愜所適，而復故人遇。
掃石坐林陰，携手話平素。
田家沾濁醪，野老薦香芋。
賡句喜新聯，談空得緣悟。
醉來恣遊賞，躋高窮一顧。
遠近閭井分，參差峯嵐聚。
鶴巢萬壑松，烟歛千村樹。
咫尺周瑜城，微茫顏羹墓。
幽懷頗同調，徘徊不能去。
更約芳春期，茲焉重遊寓。

巢縣山行遇雨

曉度金庭山夕過白龍峽兩峯爭巘岼亂石相傾壓向背
林木森橫斜蹊逕狹數聲猿嘯哀自在鶯啼恰陰巖古松
樹偃蹇露鱗甲三五田舍翁隔溪荷鋤鍾雲氣竟濛濛雨
聲常霎霎泥途詎可登急澗良難涉僕夫已勞瘁疲馬力
尤乏豈不憚馳驅皇恩未覃洽

君馬黃

君馬黃我馬白聯轡出齊門俱是天衢客暄風拂玉鞭旭
日明金勒一日千里行周爰濟難厄男兒建勳猷姓名垂
竹帛回鑑指五雲蹀躞長安陌

關山月

朝度二陽水夜上九仙山山月流清光遠照穆陵關月明
有圓缺遊子何時還

楊白花

楊花三月春顛狂逐歌舞綿輕絮薄太無情漠漠紛紛渡
江渚佳人見此獨含悲把臂蹋歌雙淚垂天長水闊思未
已楊花一去無時歸

采蓮曲

若耶溪邊日欲西處處女郎采蓮歸穠粧艷艷照溪水香
風襲襲飄羅衣蘭槳輕搖下方江一雙鴛鴦忽驚起見此
躊躇空自憐征夫塞外何時旋

大堤曲

大堤堤上多楊柳大堤人家都賣酒紛紛女兒穠艷粧唱
撥琵琶露纖手舟子收帆夜泊堤少年估客爲花迷折花
勸酒醉不醒黃金擲盡何時歸

晚過安邊營

落日黃雲慘荒營草木枯三邊烽火接萬里客心孤戰騎
沙塵染征袍雨雪濡曾聞范招討于此躡飛狐

渭河早行聞敵退

官途乘曉霽香露濕行旌涼月疎林影晨鷄遠店聲雁來
秦塞曲馬度渭川平聞道邊烽熄封章達漢京

寓秦送處士還南昌

終歲客西秦家山入夢頻如何萬里道又送故鄉人細雨

楚山曉輕雲籠樹春東湖宜結屋孺子可爲隣

龍山驛偶作

驛路通山谷人家傍驛亭芋田和雨種竹牖帶烟扁沙淺
溪流碧春深野燒青一樽聊自酌高詠欲誰聽

臨淄道中

山擁蒼崖峻溪迴綠逕斜城邊晏子廟洞口魯連家野芋
初齊葉池荷已著花舉頭蓬島近隱隱護烟霞

舟中遇同年吳圯憲副往洮泯兵備問余風俗賦此
答之

洮泯苦寒地自昔號西戎板屋家家是氍毹處處同花開
春暮後猿嘯雨聲中居處須當避南山瘴癘風

渡揚子江

曉經揚子渡畫舸一帆輕潮湧金山寺雲連鐵甕城江豚
吹浪白海日照林明坐聽鐘聲發悠然物外情

南都題族姪小莊

開軒向南圃僻近大江頭碧玉敲湘竹綃囊破海榴林喧
聞鳥度荷動見魚游更是歡游處蓮池蕩小舟

江上晚行

昨日淮西渡今宵江上行波明山月出岸闊海潮生渺渺
孤帆影寥寥一鴈聲羈懷耿不寐况復寺鐘鳴

荊州道中

盡日馳驅不憚勞耶耶陵谷半蓬蒿蘄沙洲畔雲初起

虎臺前鳥亂啼。舊水東歸滄海濶。蒙山斜倚穆陵高。不堪
滿目多遺事。馬上吟餘首重搔。

用韻寫景

征車兩月道迂閒。王事驅馳未得還。楊柳却隨春到綠。鬢
毛先向老來斑。菊松久憶荒三逕。章疏應無上九關。堪笑
鄮侯曾繫獄。祇緣名就不歸山。

時會畢都憲于鎮江設燕驛樓

鐵甕城高碧樹秋。故人相逐指瓜洲。幾年閒闊爲君寫斗
酒。殷勤許我畱。烟磬數聲京口寺。風帆一片海門舟。驛亭
醉倚朱欄曲。憶著前朝草木愁。

題感山寺次涂太守恒孚韻

寶剎環垣萬竹修春風匹馬昔曾遊花前酒醒杯仍酌石
上碁殘子不收僧梵有時來客座佛燈常夜落漁舟最憐
甘露亭孤廻百尺寒簷近斗牛

春寒

細雨疎風暖尚遙琴書客邸更蕭條怪來楊柳眉猶感殘
雪牆陰未盡消

春夜

夜深庭院寂無譁寶鴨香銷竹影斜倚徧欄干眠未得幾
枝寒月浸梨花

經九曲池

煬帝行宮俯蜀岡木蘭亭榭已荒涼可憐九曲池中水猶

帶哀音過柳塘

照天門山

巨靈穿破碧崔嵬中瀉洪流去不回
獨有天光與山色時時隨雨下江來

宿雍城驛

江上風恬水不波江亭潮滿月明多
夜深暫向驛樓宿隔岸有人歌踏莎

舟行三汊河

鷄籠回首白雲間西入三叉路幾灣
天際兩峯青似染舟人遙指說含山

舒城懷古

古舒子國漢顏真卿作堰儲水灌田至今賴之

江西詩微

卷五十

明十二

美

荒城十里枕龍眠漢業于今已棄捐
惟有頡頏三堰在舒民猶賴灌桑田